

CYNGOR SIR YNYS MÔN	
CYFARFOD:	PWYLLGOR SAFONAU (PANEL CANIATÂD ARBENNIG)
DYDDIAD:	9 HYDREF 2025
TEITL YR ADRODDIAD:	YSTYRIED CEISIADAU AM GANIATÂD ARBENNIG
PWRPAS YR ADRODDIAD:	PENDERFYNU AR GAIS AM GANIATÂD ARBENNIG GAN DDAU GYNGHORYDD SIR A THELERAU UNRHYW GANIATÂD ARBENNIG A RODDIR
ADRODDIAD GAN:	LISA LORD A GURVYNDA PADDAN-WHITE RHEOLWYR GWASANAETHAU CYFREITHIOL

DOGFENNAU YNGHLWM

1. Cod Ymddygiad ar gyfer Aelodau Cyngor Sir Ynys Môn
2. Rheoliadau Pwyllgor Safonau (Caniatáu Gollyngiadau) (Cymru) 2001
3. Rhan 4 o Reoliadau Llywodraeth Leol (Pwyllgorau Safonau, Ymchwiliadau, Gollyngiadau ac Atgyfeirio) (Cymru) (Diwygio) 2016
4. Nodyn Briffio ar Ganiatâd Arbennig a ddarparwyd gan y Pwyllgor Safonau ar gyfer aelodau etholedig Cyngor Sir Ynys Môn, ynghyd â Ffurflenni Cais a Phenderfyniadau
5. Cais gan y Cynghorydd Keith Roberts a'r Cynghorydd Jeff Evans
6. Nodyn Methodoleg ar gyfer ystyried ceisiadau am ganiatâd arbennig

1. CEFNDIR CYFREITHIOL

Yn unol â Chod Ymddygiad Cyngor Sir Ynys Môn (**Atodiad 1**), ni chaniateir i aelodau sydd â diddordeb personol neu ddiddordeb sy'n rhagfarnu gymryd rhan mewn unrhyw drafodaeth ar y mater hwnnw yng nghyfarfodydd y Cyngor Llawn, y Pwyllgor Gwaith, neu unrhyw gyfarfod y byddant yn ei fynychu yn eu rôl fel aelod o'r Cyngor.

Mae diddordebau personol yn cael eu rhestru ym mharagraff 10 o'r Cod. Mae paragraff 12 o'r Cod yn diffinio diddordebau sy'n rhagfarnu.

Mewn rhai amgylchiadau penodol, a chyfyngedig, gall aelod oresgyn y rhwystr sy'n cael ei greu gan y diddordeb personol sy'n rhagfarnu os ydynt yn gallu derbyn caniatâd arbennig gan y Pwyllgor Safonau.

Ni ellir ond rhoi caniatâd arbennig o dan yr amgylchiadau a restrir yn Adran 2 o **Atodiad 2**.

2. CEFNDIR FFEITHIOL

Mae'r Cynghorydd Keith Roberts a'r Cynghorydd Jeff Evans yn Llywodraethwyr ar Ysgol Uwchradd Caergybi, wedi'u penodi gan yr Awdurdod Lleol.

Mae'r mater fydd yn cael ei ystyried gan y Pwyllgor Sgriwtini Corfforaethol ar 15 Hydref 2025 yn ymwneud â Chanlyniadau'r Ymgynghoriad ar y Cynnig i Adleoli Dysgwyr Ysgol Uwchradd Caergybi i Adeilad Ysgol Newydd ar gyfer Dysgwyr 11-18 oed, ac eitem eithriadol yn gysylltiedig â moderneiddio cymunedau dysgu.

Gellir crynhoi'r adroddiad cyntaf fel a ganlyn:

1. Adroddiad Ymgynghoriad - Ysgol Uwchradd Caergybi:

- Canlyniad yr ymgynghoriad a gynhaliwyd rhwng 5 Mehefin 2025 a 17 Gorffennaf 2025
- Ar y cynnig i **Adleoli Dysgwyr Ysgol Uwchradd Caergybi i Adeilad Ysgol Newydd ar gyfer Dysgwyr 11-18 Oed**
- Pwrpas cynnal ymgynghoriad statudol oedd ceisio barn rhanddeiliaid / partion â diddordeb ynglŷn â'r cynnig uchod.
- Mae'r adroddiad yn crynhoi'r holl ymatebion a sylwadau a dderbyniwyd gan rhanddeiliaid i'r ymgynghoriad statudol.
- Yn unol â Chod Trefniadaeth Ysgolion (011/2018) mae'r adroddiad yn esbonio'r asesiad o'r cynnig, y gwahaniaeth rhwng yr asesiad ac unrhyw asesiad blaenorol (os o gwbl), asesu unrhyw ddewisiadau amgen rhesymol eraill **a chadarnhau p'un a ddylid gweithredu'r cynnig gwreiddiol (yn rhannol neu'n llawn).**

Mae'r eitem arall yn ymwneud â Moderneiddio Cymunedau Dysgu: Achos Amlinellol Strategol (eitem eithriadol). Gellir crynhoi'r adroddiad fel a ganlyn:

2. Achos Amlinellol Strategol (SOC) - Ysgol Uwchradd Caergybi:

- Mae'r Achos Amlinellol Strategol (SOC) hwn yn cynnwys yr achos dros adeilad ysgol newydd ar gyfer Ysgol Uwchradd Caergybi i gymryd lle'r adeilad presennol erbyn Medi 2030.
- Mae'n nodi'r achos amlinellol strategol ar gyfer sicrhau 81% o'r cyllid (grant) o dan Raglen Cymunedau Dysgu Cynaliadwy Llywodraeth Cymru ar gyfer adeilad ysgol newydd ar gyfer Ysgol Uwchradd Caergybi.

Oherwydd arwyddocâd y materion, a'u heffaith ar y gymuned leol, ystyrir y byddai'n ddoeth, ac er budd gorau o ran tryloywder a chynnal hyder y cyhoedd, i geisio caniatâd arbennig.

3. Y CAIS

Mae'r ceisiadau sydd angen eu hystyried wedi eu cynnwys yn **Atodiad 5**.

Mewn perthynas â'r Cynghorydd Keith Roberts, nodir iddo gael ei benodi'n Llywodraethwr gan y Cyngor Sir. Mae ganddo, felly, ddiddordeb personol yn unol â'r Cod Ymddygiad (gweler paragraff 10(2)(a)(viii)). Mae'r Cod yn cynnwys eithriad ym mharagraff 12(2)(a)(iii) sy'n golygu nad oes ganddo ddiddordeb sy'n rhagfarnu oni bai bod y mater yn ymwneud â dyfarnu ar unrhyw gymeradwyaeth, cydsyniad, trwydded, caniatâd neu gofrestriad (paragraff 12(3)). Mae'r ddarpariaeth yn y Cod yn caniatáu i'r aelod gymryd rhan lawn mewn materion addysg yn gyffredinol, a materion sy'n ymwneud yn benodol ag Ysgol Uwchradd Caergybi. Mae'r mater penodol dan sylw yn cael effaith sylweddol ar Ysgol Uwchradd Caergybi ac, yn benodol, mae'n ymwneud â Chanlyniadau'r Ymgynghoriad ar y Cynnig i Adleoli Dysgwyr Ysgol Uwchradd Caergybi i Adeilad Ysgol Newydd ar gyfer Dysgwyr 11-18 Oed. Fel y nodwyd uchod, oherwydd natur y mater, ystyrir y byddai'n ddoeth ac er budd gorau o ran tryloywder a chynnal hyder y cyhoedd, i geisio caniatâd arbennig.

Mewn perthynas â'r Cynghorydd Jeff Evans, mae'r un ystyriaethau'n berthnasol ac, yn ogystal, dylid nodi fod y Cynghorydd Jeff Evans yn Gadeirydd y Pwyllgor Sgrwtini Corfforaethol.

4. YSTYRIAETHAU'R PANEL

Dylai'r Panel ystyried y Nodyn Methodoleg sydd wedi'i gynnwys yn (**Atodiad 6**)

Os bydd y Panel yn penderfynu rhoddi caniatâd arbennig, dylai hefyd ystyried gosod cyfyngiadau e.e. cyfyngu'r caniatâd arbennig yn benodol i'r diddordebau hynny a nodwyd yn y cais, neu ymestyn y caniatâd arbennig i gynnwys materion eraill a gyfyd mewn perthynas â'r mater hwn yn y dyfodol, ac ati. Cyfeirir y Panel at y 'Ffurflen Penderfyniad' a gynhwysir yn **Atodiad 4** sydd yn nodi'r ystyriaethau a allai fod yn berthnasol.

5. ARGYMHELLION

Ystyried rhinweddau'r cais a:

(A) penderfynu p'un a ddylid rhoddi caniatâd arbennig ai peidio; a,

(B) os rhoddir caniatâd arbennig, ystyried:-

- (i) ar ba sail neu seiliau y rhoddir y caniatâd arbennig; a
- (ii) a ddylid gosod unrhyw gyfyngiadau